

**ТӨРИЙН АЛБАНЫ ТУХАЙ ХУУЛЬД НЭМЭЛТ ОРУУЛАХ ТУХАЙ ХУУЛИЙН
ТӨСЛИЙН ХЭЛЭЛЦЭХ ЭСЭХ ТАЛААРХ ТӨРИЙН БАЙГУУЛАЛТЫН
БАЙНГЫН ХОРООНЫ САНАЛ, ДҮГНЭЛТ**

2022 оны 10 дугаар
сарын 25-ны өдөр

Улаанбаатар
хот

Илтгэгч нь: Улсын Их Хурлын гишүүн Ц.Мөнхцэцэг

Улсын Их Хурлын дарга, эрхэм гишүүд ээ,

Монгол Улсын Их Хурлын гишүүн С.Чинзориг нарын 5 гишүүн 2022 оны 10 дугаар сарын 12-ны өдөр Улсын Их Хуралд өргөн мэдүүлсэн Төрийн албаны тухай хуульд нэмэлт оруулах тухай хуулийн төслийн хэлэлцэх эсэх асуудлыг Төрийн байгуулалтын байнгын хороо 2022 оны 10 дугаар сарын 25-ны өдрийн хуралдаанаараа хэлэлцлээ.

Хууль санаачлагч аймгийн төвөөс бусад суманд ажиллаж байгаа төрийн захиргааны албан хаагчид тасралтгүй, тогтвор суурьшилтай ажилласны урамшуулал олгох хууль, эрх зүйн орчин зохицуулалт байхгүйн улмаас сумын төрийн захиргааны байгууллагууд хүний нөөцийн дутагдалд орох, албан хаагчид тогтвор суурьшилтай ажиллахгүй байх нөхцөл үүсч, суманд ажиллах албан хаагчдын тоо жил бүр буурч байна.

Иймд аймгийн төвөөс бусад сумын Засаг даргын Тамгын газарт тасралтгүй ажиллаж байгаа төрийн захиргааны албан хаагчид таван жил тутамд нэг удаа зургаан сарын үндсэн цалинтай нь тэнцэх хэмжээний мөнгөн урамшуулал олгох зохицуулалтыг тусгаж Төрийн албаны тухай хуульд нэмэлт оруулах тухай хуулийн төслийг боловсруулсан байна.

Хуулийн төсөлд иргэдийн оролцоог хангах, санал авах зорилгоор Улсын Их Хурлын “D.Parliament.mn” цахим системд байршуулсан болно.

Байнгын хорооны хуралдаанаар хуулийн төслийг хэлэлцэх үед Улсын Их Хурлын гишүүн Ц.Мөнх-Оргил төрийн албан хаагчдад сар бүрийн цалин дээр тогтмол олгох нэмэгдэл нь нэг удаагийн шинжтэй мөнгөн урамшуулал, тэтгэмжээс илүү үр дүнтэй гэж үзсэн Засгийн газрын байр суурийг хэрхэн хүлээж авч байгаа талаар, Улсын Их Хурлын гишүүн М.Оюунчимэг эрхэлж байгаа албан тушаалын байдлаар нь тусгайлан хуульчлах нь хэр оновчтой талаар, Монгол Улсын 2023 оны төсвийн тухай хуулийн төсөлтэй хамт өргөн мэдүүлсэн Төрийн албаны тухай хуульд нэмэлт, өөрчлөлт оруулах тухай хуулийн төсөлтэй уялдах эсэх талаар, Улсын Их Хурлын гишүүн Ё.Баатарбилэг Төрийн албаны зөвлөлөөс гаргуулсан судалгаанаас гадна ямар шалтгаанаар аймгийн төвөөс бусад суманд ажиллаж байгаа төрийн захиргааны албан хаагчдын тогтвор суурьшилтай ажиллахгүй байгаа талаар дэлгэрэнгүй судалгаа бий эсэх, цалин урамшууллаас гадна албан хаагчдын ажиллах нөхцөлийг бүрдүүлэх, нийгмийн баталгааг хангах арга хэмжээний талаар судалж үзсэн эсэх талаар тус тус асуулт асууж, хариулт авсан болно.

Мөн Улсын Их Хурлын гишүүн Г.Ганболд сумдын төрийн захиргааны албан хаагчид албан тушаалын тодорхойлолтод зааснаас гадна өөр албан тушаалын ажлыг давхар гүйцэтгэдэг бөгөөд үүнээс үүдэн тогтвор суурьшилтай ажиллахгүй байх, суманд ажиллах албан хаагчдын тоо жил бүр буурч, хүний нөөцийн дутагдалд орсон нь хуулийн төслийг боловсруулах бодит шаардлага болсон тул хуулийн төслийг

хэлэлцэхийг дэмжиж байгаа талаар, Улсын Их Хурлын гишүүн Н.Энхболд сумд хуулиар олгосон эрх хэмжээнийхээ хүрээнд зарим төрлийн татварыг нэмэгдүүлж, түүнээс бүрдэх орлогоор шаардлагатай мэргэжилтэн, албан хаагчаа сургах, хүний нөөцийн дутмаг байгаа асуудлаа цогцоор нь бие даан шийдвэрлэх боломжтой талаар, Улсын Их Хурлын гишүүн С.Амарсайхан хуулийн төсөлд тусгасан асуудлыг төрийн албаны цалин хөлсний тогтолцооны шинэчлэлийг хийх үеэр нэг мөр авч үзэх, тэгш хандах, алслагдсан дүүргүүдийн албан хаагчдын асуудлыг орхигдуулахгүй байх нь зүйтэй талаар, Улсын Их Хурлын гишүүн Ё.Баатарбилэг орон нутгийн нэмэгдэл, тэтгэмж, урамшууллыг ангилж, ойлголтуудыг тодорхой болгох, хуулийн хэрэгжих хугацааг ойртуулах боломжыг судлах талаар, Улсын Их Хурлын гишүүн С.Бямбацогт төвлөрлийг сааруулах бодлогын хүрээнд иргэн хөдөө, орон нутагт ажиллаж амьдрах нөхцөл, нийгмийн баталгааг хангах, Монгол Улсын 2023 оны төсвийн тухай хуулийн төсөлтэй хамт өргөн мэдүүлсэн Төрийн албаны тухай хуульд нэмэлт, өөрчлөлт оруулах тухай хуулийн төсөлтэй хамтатган хэлэлцэх нь зүйтэй талаар тус тус саналаа илэрхийлсэн болно.


Төрийн албаны тухай хуульд нэмэлт оруулах тухай хуулийн төслийг Байнгын хорооны хуралдаанд оролцсон гишүүдийн дийлэнх олонх буюу 90.9 хувь нь үзэл баримтлалын хүрээнд хэлэлцэхийг дэмжсэн болно.

Улсын Их Хурлын эрхэм гишүүд ээ,

Төрийн албаны тухай хуульд нэмэлт оруулах тухай хуулийн төслийг хэлэлцэх эсэх талаарх Төрийн байгуулалтын байнгын хорооны санал, дүгнэлтийг хэлэлцэн шийдвэрлэж өгөхийг Та бүхнээс хүсье.

Анхаарал тавьсанд баярлалаа.

**ТӨРИЙН БАЙГУУЛАЛТЫН
БАЙНГЫН ХОРООНЫ ХУРАЛДААН
ДАРГАЛАГЧ**



Handwritten signature and red official stamp of the State Court of the Mongolian People's Republic. The stamp contains the text: ТӨРИЙН БАЙГУУЛАЛТЫН ХОРООНЫ ХУРАЛДААН, ДАРГАЛАГЧ, and the date 2023.09.09.

Д.ТОГТОХСҮРЭН